

Temeljem članka 13. Zakona o ministarstvima i drugim organima uprave Tuzlanskog kantona ("Službene novine Tuzlanskog kantona" broj: 17/00, 3/01. 12/03 i 10/05), članka 6. Zakona o veterinarstvu u Bosni i Hercegovini ("Službeni glasnik Bosne i Hercegovine" broj: 34/02), članaka 40. i 41. Zakona o veterinarstvu ("Službene novine Federacije Bosne i Hercegovine" broj: 46/00), Pravilnika o mjerama za suzbijanje i iskorjenjivanje bruceloze goveda, ovaca, koza i svinja ("Službeni list SFRJ", broj: 34/89), Odluke o mjerama kontrole bruceloze malih preživača i uvjetima za određivanje zdravstvenog statusa stada ovaca i koza u pogledu bruceloze malih preživača ("Službeni glasnik Bosne i Hercegovine" broj: 70/05), i članaka 43. i 46. Zakona o poljoprivrednom zemljištu ("Službene novine Federacije Bosne i Hercegovine" broj: 2/98), Ministarstvo poljoprivrede, šumarstva i vodoprivrede Tuzlanskog kantona, donosi

NAREDBU

o mjerama za suzbijanje i iskorjenjivanje bruceloze goveda, ovaca, koza i svinja na području Tuzlanskog kantona i uvjeta nomadske ispaše ovaca

I.

1. Svaku pojavu zaraze ili sumnje na zaraznu bolest, držalac životinja dužan je odmah prijaviti kantonalnoj veterinarskoj inspekciji ili veterinarskim stanicama na području Kantona.
2. Pod znacima na temelju kojih se može posumnjati da se pojavila zaraza ili sumnja na zaraznu bolest bruceloze, smatraju se: pobačaji krava, ovaca, koza i svinja, te uginuća ovaca i koza.
3. U slučaju pojave zaraze ili sumnje na zarazu, držalac životinja dužan je odmah zaustaviti promet životinja, izdvojiti zdrave životinje od bolesnih ili životinja sumnjivih na zarazu, zabraniti pristup svim stranim osobama u ekonomsko dvorište i sačuvati leš uginule životinje do veterinarskog pregleda, a poslije pregleda izvršiti naređene i propisane mjere.
4. U dvorištu i objektu u kojima je utvrđena bruceloza goveda, ovaca, koza i svinja naređuju se sljedeće mjere:
 - 4.1. zabrana kretanja oboljelih životinja iz zaraženog stada izvan zaraženog objekta i zaraženog dvorišta,
 - 4.2. ubijanje zaraženih i na zarazu sumnjivih goveda, ovaca, koza i svinja u zaraženom stadu,
 - 4.3. neškodljivo uklanjanje fetusa, lohija i placenti,
 - 4.4. neškodljivo uklanjanje leševa ubijenih životinja,
 - 4.5. dijagnostičko ispitivanje na brucelozu svih životinja koje se mogu zaraziti brucelozom u tom dvorištu,
 - 4.6. dijagnostičko ispitivanje na brucelozu svih goveda, ovaca, koza i svinja u zaraženom mjestu,
 - 4.7. zabrana korištenja mlijeka iz zaraženih stada krava, ovaca i koza,
 - 4.8. ograničenje korištenja za priplod životinja iz zaraženog dvorišta, izuzev vještačkog osjemenjavanja,
 - 4.9. dezinfekcija zaraženog objekta i zaraženog dvorišta i obvezno odstranjivanje prostirke i gornjih slojeva zemlje i njihovo zakopavanje (djelotvorna je dezinfekcija 5% otopina svježe gašenog kreča),
 - 4.10. pakovanje i odlaganje stajnjaka iz zaraženih objekata.

II.

1. Veterinarske stanice i kantonalni veterinarski inspektori su dužni po prijavi držaoca životinja provesti postupak utvrđivanja zaraze, odnosno sumnje na zarazu (epidemiološko istraživanje).
2. Veterinarska stanica je dužna dostaviti Veterinarskom zavodu Tuzlanskog kantona u Tuzli dijagnostički materijal radi ispitivanja na brucelozu.
3. Smatra se da je bruceloza goveda, prestala u zaraženom stadu: ako su izvršene sve naređene veterinarsko sanitarne mjere, ako je poslije trokratnog pregleda u razmaku od tri mjeseca dobijen negativan rezultat, pod uvjetom da je treći pregled izvršen najkasnije 15 dana nakon posljednjeg telenja.
4. Posjed sa stadima ovaca ili koza službeno slobodan od bruceloze je:
 - a) posjed:
 1. na kojem nijedna životinja primljiva na brucelozu nije imala kliničkih niti bilo kojih drugih znakova u posljednjih 12 mjeseci;
 2. na kojem nema nijedne ovce ili koze koja je cijepljena protiv bruceloze;
 3. na kojem je provedeno dvokratno pretraživanje ovaca i koza u razmaku ne manjem od 6 mjeseci i ne dužem od 1 godine, s negativnim rezultatom, na način opisa u dodatku B. dijelu I. stavak 1. Odluke o mjerama kontrole malih preživača i uvjetima za određivanje zdravstvenog statusa stada ovaca i koza u pogledu malih preživača (u daljem tekstu: Odluka), na svim ovcama i kozama na posjedu, starijim od 6 mjeseci,
 4. na kojem se nakon provedenoga pretraživanja iz prethodnog stavka točke 1., nalaze samo životinje

"Službene novine Tuzlanskog kantona", broj: 03/08

ojanjene ili ožarene na tome posjedu ili koje su došle s posjeda koji je službeno slobodan od bruceloze, sukladno uvjetima iz dodatka I. točke D. Odluke, i

5. koje, nakon utvrđivanja statusa posjeda službeno slobodnog od bruceloze, i dalje udovoljava uvjetima iz dodatka I, točke B. Odluke.

b) posjed koji se nalazi u epidemiološkoj jedinici službeno slobodnoj od bruceloze.

III.

1. Držalac životinja s područja drugih kantona (epizootioloških područja) pri dolasku na teritorij Tuzlanskog kantona, radi zimovanja ili ispaše, obavezan je da prije kretanja sa područja dolaska, obezbijedi svjedodžbu o zdravstvenom stanju sitnih životinja (ovce, koze), a za goveda pored zdravstvenog uvjerenja i dokaz da posjeduje stočni pasoš. Prije dolaska na područje Tuzlanskog kantona držalac životinja je obavezan obavjestiti Kantonalnu upravu za inspekcijske poslove.

2. Na držaoca-vlasnika životinje koji vrši tranzit životinja preko područja Tuzlanskog kantona, primjenjuje se odredba stavka 1. ove točke, osim najave.

3. Svjedodžba o zdravstvenom stanju životinja pošiljaka u unutarnjem prometu mora biti popunjena kako je definirano u Odluci o veterinarskoj svjedodžbi o zdravstvenom stanju životinja i pošiljaka životinjskog porijekla u unutarnjem i međunarodnom prometu.

4. Službene osobe policijskih uprava, u granicama svojih nadležnosti, kontrolišu da li držaoci životinja i proizvođači životinjskog porijekla posjeduju sljedeću dokumentaciju:

4.1. zdravstveno uvjerenje za sitne životinje (ovce, koze);

4.2. zdravstveno uvjerenje, stočni pasoš i C Obrazac za krupne životinje (goveda);

4.3. ugovor o zakupu zemljišta na kojem će vršiti sezonsku ispašu. U protivnom, službene osobe policijskih uprava su obavezne da zabrane dalje kretanje životinja i obavjeste Kantonalnu upravu za inspekcijske poslove.

5. Ako se na području Tuzlanskog kantona nađu na sezonskoj ispaši životinje bez navedene dokumentacije iz stavka 4. ove točke, od strane pripadnika policije i kantonalne veterinarske inspekcije, provest će se sljedeće mjere radi sprečavanja i širenja zarazne bolesti:

5.1. svim zatečenim vlasnicima životinja zabraniti dalje kretanje;

5.2. sve zatečene životinje podvrgnuti karantinskom tretmanu u terenskim uvjetima (ogradi ili dovesti u najbliže uvjete za provođenje karantinskih mjera);

5.3. sve životinje ispitati na brucelozu;

5.4. na temelju rezultata analize, postupiti sukladno sa pozitivnim propisima (klanje ili neškodljivo uklanjanje pozitivnih reaktora, DDD mjere na terenu).

6. Životinje koje, na temelju ispitivanja, budu proglašene zdravima, moraju se vratiti u mjesto stalnog boravka i to isključivo kamionima namijenjenim za transport životinja, uz poštivanje svih mjera bezbjednog transporta životinja, uz propisanu dokumentaciju od strane nadležnog veterinarskog inspektora. Vađenje krvi vršit će veterinarska organizacija koja je odgovorna za epizootiološko područje na kojem su životinje zatečene.

7. Sve dijagnostičke analize vršit će se u Veterinarskom zavodu Tuzlanskog kantona u Tuzli.

8. Od momenta stavljanja stada u karantin do okončanja navedenih mjera, asistenciju će pružati nadležna policijska uprava.

9. Sve troškove koji nastanu provođenjem ove Naredbe snose:

9.1. vlasnik životinja ili zatečena stranka (čuvar ili držalac životinja);

9.2. u slučaju odbijanja ili nemogućnosti namirenja troškova, naknadu izvršiti prodajom zdravih životinja po tržišnim uvjetima. Ovaj postupak će provesti Komisija koju čini: nadležni veterinarski inspektor, predstavnik veterinarske organizacije, koja je odgovorna za epizootiološko područje, predstavnik lokalne uprave i predstavnik Ministarstva.

IV.

Naređuje se zabrana sezonske ispaše ovaca, ovnova i jagnjadi na poljoprivrednom zemljištu gonjenja izvan mjesta prebivališta, odnosno sjedišta držaoca ovaca. Vlasnici ovaca, koje se dopremaju prijevoznim sredstvima, moraju posjedovati zaključen ugovor o zakupu sa zakupodavcem zemljišta, za ispašu ovaca, na tom zemljištu. Ugovor mora sadržavati podatke o zakupcu i zakupodavcu zemljišta, o vremenu za koje je ugovorena ispaša, o broju ovaca koje se mogu napasati, o površini zemljišta i mjestu na kojem se to zemljište nalazi. Ugovor se registrira kod općinskog organa uprave nadležnog za poslove poljoprivrede u mjestu ispaše ovaca, a što je sukladno sa Zakonom o poljoprivrednom zemljištu. Mjere iz stavka 1. ove točke provodi kantonalna poljoprivredna inspekcija. Poduzet će se sankcije sukladno sa Zakonom o poljoprivrednom zemljištu i drugim zakonskim aktima.

V.

U slučaju da se ne provedu mjere iz točaka I, II, III i IV ove Naredbe, u redovnom procesu, kantonalna inspekcijska služba (veterinarska i poljoprivredna), uz podršku osoba iz policijskih uprava, provest će prinudno vraćanje stada u mjesto prebivališta, sukladno sa točkom III stavak 5. ove Naredbe.

"Službene novine Tuzlanskog kantona", broj: 03/08

VI.

Provođenje mjera suzbijanja i iskorjenjivanja bruceloze goveda, ovaca, koza i svinja i sezonske ispaše ovaca, vršit će se pod nadzorom kantonalnih veterinarskih i poljoprivrednih inspektora.

VII.

Ova naredba stupa na snagu odmah, a objavit će se u "Službenim novinama Tuzlanskog kantona".

Stupanjem na snagu ove Naredbe, prestaje da važi Naredba

broj: 04/1-08-24-20071/05 od 15. 11. 2005. godine.

Broj: 04/1-24-1838/08 MINISTAR

Tuzla, 6. 4. 2008. godine **mr. Amir Hasić, dipl. ing. agr., v.r.**